

Premier Wever-Croes y minister Dangui Oduber ta anuncia

Licencia pa esnan interesa den produccion y cultivo di cannabis



ORANJESTAD – Ayera mainta e tema controversial rond di produccion y cultivo di cannabis cu un meta medicinal a finalisa cu e anuncio oficial haci pa prome minister, Evelyn Wever-Croes y minister di Salubridad Publico, Dangui Oduber.

E mandatarionan a informa cu gobierno lo cuminsa otorga licencia pa e inversionista of empresario interesa den e actividad aki. E proceso di

legislacion ya a cuminsa y e mester bay Raad van Advies (RvA) pa finalmente termina den parlamento pa debati ariba.

E produccion y cultivo di cannabis ta un actividad cu gabinete Wever-Croes ta considera como un industria of pilar economico cu por trece desaroyo pa nos pais y produci entrada pa caha di gobierno, ademas di genera cupo di trabou. Nan lo habri un desk na Departamento di

Progreso Laboral pa percura cu e hendenan cu ta interesa pa traha den e area di produccion y cultivo di cannabis por haya trabou. El a recorda cu e asunto aki ta parti di e acuerdo di gobernacion cu e partido di coalicion (MEP-POR-RED) a firma.

“Desde e momento aki nos ta invita tur esnan cu ta interesa pa por expresa nan interes,” premier Wever-Croes a bisa. Ya caba nan tin calculacion cu pa e aña aki mes, gobierno

por ricibi entradanan di alrededor di 15 miyon florin pa concepto di licencia so. Pa aña 2021 e entrada cu gobierno ta premira por yega na 50 miyon florin, cu lo yuda -segun e prome mandatario- reemplaza e crisis tax.

Licencia y areanan

E licencianan lo wordo otorga na esunnan cu ta cumpli cu e condicionnan, cu ta relativamente estricto, segun premier Wever-Croes. Nan ta produccion y cultivo na areanan cu ta wordo asigna pa gobierno cu exigencia di seguridad estricto y halto. E produccion di cultivo di cannabis ta destina pa exportacion so y pa uso medicinal di cannabis so.

E prome mandatario tabata enfatico pa bisa cu su gobierno no ta legalisa plantacion di cannabis unda cu ta of/y pa tur hende. Ademas humamento di cannabis gewoon ta keda un hecho castigabel. Solamente esnan cu por cumpli cu condicionnan hopi estricto por bin na remarca pa e licencia.

Di su banda, minister Dangui Oduber a bisa cu gobierno tin algun area caba cu eventualmente lo destina pa e actividad aki. Nan ta tres area cu el a prefera di reserva

nan number y na unda nan ta situa. Tampoco e no a bisa ainda cuanto grupo ta interesa pa adkiri e licencia aki. Pero unavez cu esaki tuma lugar, nan lo determina como gobierno cuanto licencia lo otorga. Nan no por bisa adelanta cuanto nan ta, pero nan kier mantene esaki competitivo pa esnan cu kier expresa seriamente nan interes. El a bisa cu e actividad aki ta demanda inversionnan cuantioso pa cuminsa opera e negoshi aki.

El a referi na e hecho cu for di luna di december ultimo, gobierno a legalisa importacion di cannabis medicinal. Tambe pa cumpli cu regla internacional, e hoben mandatario a indica cu mester tin un bureau medicinal cannabis manera Hulanda tin caba. E bureau aki lo ta e unico instituto cu por exporta e produccion di cannabis local.

El a splica cu e cannabis aki mester ta liber di contaminacion prome cu exporta. E test mester wordo haci pa un laboratorio, y den caso cu pa e tempo ey Aruba no tin un laboratorio, nan lo cera un contract cu laboratorio cu por test e cannabis cu ta exporta. Ademas nan mester tin un certificado di origen.